

## A. Ilay fifanandrinana:

### ❖ Ny fiankohofana.

- Ireo zavamanan'aina any an-danitra dia miankohoka amin'Andriamanitra noho ny heriny mamorona (Apok. 4:11; Joba 38:6-7).
- Ho an'i Satana, ny faniriany dia ny handray ny fiankohofan'izao tontolo izao amin'ny alalan'ny “bibidia” izay omeny fahefana “hamorona” sary ahafahany mandray ny fiankohofan'izao rehetra ary izao (Apok. 13:2, 4, 14-15).
- Tsy mahagaga raha ny Sabata no fototry ny fifanandrinana amin'izay fotoana izay. Ireo izay “mitandrina ny didin'Andriamanitra sy ny finoana an'i Jesosy” (Apok. 14:12) dia miankohoka Aminy amin'ny andro fahatsiarovana ny famoronany.

### ❖ Ny tsy fandefarana.

- Tsy ara-nofo ny ady ataontsika, fa ara-panahy (Efes. 6:12). Tsy mampiasa fitaovam-piadiana ara-nofo isika, fa ara-panahy (2Kor. 10:3-5). Saingy, ny fahavalo dia tsy mihambahamba mampiasa fiadiana ara-nofo amintsika.
- Tsy zava-poana ny “loza” ho an'ny mpino, noho ny fanafihana mahery vaika ataon'i Satana amin'ny fiangonana mahatoky (Apok. 12:12). Ho azy, dia azo am-piasaina ny fiadiana rehetra.
  - 1) Maka fanahy antsika amin'ny filàntsika izy (Jakoba 1:14)
  - 2) Mandresy lahatra antsika amin'ny hafetsena izy (2 Kor. 4:3-4)
  - 3) Mampiasa olona akaiky antsika (Mat. 10:34-36)
  - 4) Mikapoka sy mandrahona izy (Asa 5:40)
  - 5) Mampiasa herisetra feno habibiana (Jaona 16:2)
- Toy izany no nataony teo amin'ny tantara, ary ho toy izany ny fanafihana farany hataony: fitaka sy hafetsena (Apok. 13:13-14); fampiharana sazy ara-toekarena (Apok. 13:16-17); didim-panjakana mampamono ho faty ho an'izay tsy miankohoka aminy (Apok. 13:15).

## B. Ilay fahavalo:

### ❖ Ny seza fiandrianan'ny dragona.

- Satana no ilay dragona (Apok. 12:9), fa ilay bibidia, izay ampiasainy ny heriny, dia ilay bibidia faha-4 ao amin'ny Daniela 7.
- Ny Apokalypsy 13 dia fanazavana fanampiny ny toko faha-12. Manomboka taorian'ny fikasana hamono an'i Jesosy sy ny niakarany tany an-danitra izany (Apok. 12:3-5). Ireo andininy voalohany dia mivalapatra amin'ny fanafihana ny fiangonana nandritra ny 1 260 taona, ary ny andininy sisa dia mifantoka amin'ireo toe-javatra mifandray amin'ny fahatezeran'ilay dragona. (Apok. 12:17).
- Tsikelikely, dia tavela teo am-pelatanan'ny fiangonana ny fahefan'i Roma, izay nanjary fahefana ara-politika ka nahatonga azy ho ilay fahefana manevateva an'Andriamanitra ary nanenjika ny fiangonana mahatoky (Apok. 13:4-8).

### ❖ Ilay fery sitrana.

- Taorian'ny nampiasany ny heriny nandritra ny taonjato maro mba “hamaboana” sy “hamonoana amin'ny sabatra” (Apok. 13:10), dia ny Eglizy Romana mihitsy no nentina ho amin'ny fahababoana (izay nitranga tamin'ny lohany: Pie VI) ary niaritra “fery saika nahafaty azy.” (Apok. 13:3).
- Na dia nihazona ho fananany ny Fanjakana Papaly aza ny Papa hatramin'ny taona 1870, dia namoy ny faritaniny rehetra izy rehefa nitsangana ny Fanjakan'i Italia.
- Tamin'ny 1929, dia nekena ho fanjakana mahaleo tena ny tanànan'i Vatican. Nanomboka sitrana ilay fery. Ary inona no hitranga manomboka eo?
- Koa satria efa mihamiseho ireo toe-javatra hitranga amin'ny farany, dia hisy fitadiavana mpitarika ho an'izao tontolo izao izay hanolotra vahaolana amin'ny krizy manerantany. Anisan'ny vahaolana iray tsy isalasalana ao anatin'ny maro atolotry ny Papa ny fampidirana ny fialan-tsasatry ny Alahady izay teboka fototra ho amin'ny firaisan'ny fianakaviana, ny vahoaka ary ny firenena.

### ❖ Zanak'ondry sy dragona.

- Nipoitra avy tamin'ny fahalotoan'ny Fiangonana naorin'i Jesosy ilay bibidia voalohany. Rehefa naratra izy, dia nitady “mpaminany sandoka” hisolo azy sy hanampy azy ho sitrana i Satana (Apok. 13:11; 16:13). Nahita mpiara-dia indray izy avy amin'ny firenena iray nipoitra sady niorina tamin'ny foto-kevitra madion'ny Kristianisma: Amerika Avaratra.

- Nanomboka nanahaka an'i Jesosy (ny Zanak'ondry) izy. Firenena repoblikana (tsy misy mpanjaka, tsy misy satroboninahitra), ary mifototra amin'ny fisarahan'ny fahefana roa (tandroka): ny fanjakana sy ny fivavahana.
- Amin'ny maha-fahefana voalohany azy maneran-tany, dia efa manomboka miteny toy ny dragona izy. Tsy ho ela dia hanomboka hamoaka lalàna momba ny raharaha ara-pivavahana izay, hanohana ny Papa izy, ka hamorona ny “sarin'ny bibidia” (Apok. 13:12-14).